



UNIVERSITÄTS-
BIBLIOTHEK
PADERBORN

Universitätsbibliothek Paderborn

Marii Mercatoris S. Augustino Æqualis Opera Quæcumque Extant

[Complectens Ea Quæ Ad Hæresim Nestorianam Spectant]

Marius <Mercator>

Parisiis, 1673

Caput XV. Aliud de virga Mosis.

urn:nbn:de:hbz:466:1-14215

brantes pennis suis super propitiatorium; & vultus eorum adinvicem respicientes propitiatorium erunt. Enigma certissimum id sit, Deum Verbum etiam in humanitate Deum mansisse, & in sua gloria ac maiestate, etsi propter dispensationem factus sit similis nostri: Propitiatorium namque per fidem factus est nobis Emmanuel. Ad autem nobis comprobavit sapientissimus Joannes dicens: *Filioli, scribo vobis, ut non peccetis; sed si quis peccaverit, consolatorem habemus apud Patrem, JESUM CHRISTUM justum; & ipse est propitiatio pro peccatis nostris.* Necnon etiam Paulus: *Quem pro-*

posuit, inquit, Deus propitiatorium per fidem in suo sanguine.

Cæterum cerne Cherubim circumstantes propitiatorium, & superobumbrantes quidem pennis; conversos autem ad propitiatorium, & pene nutui dominico oculum intendentes. Ad Dei enim voluntatem tantum respicit sancta caelestium spirituum multitudo, & nunquam Dei factiatur aspectu. Ita Filium propheta Isaias *Isai. 6. v. 1.* vidisse se dicit, in sede altissima & eminentissima, circumstantibus Seraphim, & obsequentibus ei, ut Deo.

CAPUT XV.

Aliud de virga Moysis.

DESTINABATUR aliquando divinus Moyses, ut Israel ab Ægyptiorum violentia liberaret. Verum quoniam necesse erat eos, qui sub jugo essent servitutis insolite, prius docere, quod eis Deus jam esset reconciliatus, prodigia cum facere imperabat: plerumque enim miraculum nos adducit in fidem. Ait igitur Moyses ad Deum omnipotentem: *Si autem non crediderint mihi, neque audierint vocem meam, dicentes: Non apparuit tibi Deus; quid dicam illis? Dixit deinde Dominus: Quid hoc est, quod est in manu tua? Respondit: Virga. Et ait illi: Projice illam in terram, & facta est serpens, & fugit Moyses ab ea. Et dixit Dominus ad Moysen: Extende manum tuam, & apprehende caudam ejus; & extendens manum apprehendit caudam, & facta est virga in manu ejus. Et dixit illi: Ut credant tibi, quia apparuit tibi Dominus Deus patrum suorum, Deus Abraham, & Deus Isaac, & Deus Jacob. Animadvertite in his natura & veritate Filium Dei, tanquam quædam virga sit Patris; virga autem in ligno est regni: Filio enim dedit habere omnium potestatem. Unde etiam divinus David: *Thronus tuus, inquit, Deus in seculum sæculi, & virga æquitatis, virga regni tui.* Sed eam projecit in terram, id est, corpore terreno circumdedit, sive per humanitatem misit in terram: tunc enim in similitudine factus est malignorum hominum, scilicet malignitatis lignum est serpens.*

Quod autem verum sit, hinc scimus.

Ipse enim Dominus noster JESUS Num. 11. v. 1. CHRISTUS, imagine & figura, propter dispensationem factam cum carne, pro serpente accipitur æreo, quem erexit Moyses, ut serpentum morsus arceret. Ait enim: *Et sicut Moyses exaltavit serpentem in deserto, ita oportet exaltari filium hominis, ut omnes qui credunt in ipsum, non pereant, sed habeant vitam æternam.* Quem admodum enim serpens factus ex ære salutis erat periclitantibus causa: (sanabantur enim in eum respicientes) eo modo etiam Dominus JESUS CHRISTUS eis, qui eum vident quidem in similitudine malignorum, eo quod factus sit homo, non ignorant tamen, quod Deus sit vivificus; causa erit vitæ, & dat posse animalia venenosa vitare, id est, contrarias potestates.

Id quoque hujus rei figura sit, quod Exod. 4. v. 1. Moyses virga virgas alias devoraverit, quas in terram magi projecerat. Igitur virga quidem in terram projecta est; non tamen semper remansit. Resumpta autem iterum fuit, quod erat: nam licet facta sit, ut ante dixi, in similitudine nostra Patris virga, id est, Filius, qui habet omnium potestatem; at tamen impleta dispensatione, revolavit in cælum, & fuit iterum tanquam in manu Patris Ps. 44. v. 7. virga æquitatis, ac regni: sedet enim ad dexteram genitoris sui in propria maiestate, sedes altissimas obtinens, etiam cum carne.

